

奩

史

舊史卷四十二

東吳王初桐于陽纂述

京口高雲青士校刊

井臼門

操作

恭王妻郭昌號郭主好節儉手常操作

小名錄

馮衍妻任氏得忌不蓄媵妾常自操井臼

東觀漢記

麗人薛素素性好操理繁細

詩話類編

江西婦人皆習操作衣服之上以帛爲帶交結胸前
後富者至用錦繡其實便操作也

岳陽風土記

丁新婦者丹陽丁氏女年十六適全椒謝家其姑嚴酷使役不能堪九月九日縊死遂有靈發言於巫祝曰念人家婦女作息不倦使避九月九日勿用作事江南婦人祀之呼爲丁姑是日忌作事咸以爲息日也
丁新婦傳

女狄暮汲得月精吞之遂有娠

遁甲開山圖榮氏解

伊尹母方孕行汲化爲枯桑其夫尋至水濱見桑穴中有兒乃收養之

尚書大傳

彭娥負器出汲賊至將殺娥娥仰天大呼山崩壓賊死娥捨汲器化爲石

幽明錄

王汝南少無婚自求郝普女既婚果有令姿淑德生東海遂爲王氏母儀或問汝南何以知之曰嘗見井上汲水容止不失常以此知之

世說

唐僧圓澤見婦人錦襜負笕而汲曰此吾托身之所也至暮澤亡而婦乳

太平廣記

峽中婦人汲水皆負木盎於背

入蜀記

蜀中有小吏山行日將暮見道傍一婦人攜汲器立溪側小吏就丐飲且挑狎之婦人初無難色吏引手捫其胸臆間毛長數寸冷如冰驚呼而走婦人大笑挈汲器徐步而去

癸車志

甯賞嘗以未曉起盥櫛俄一女子至荷筠筒候門徘徊羞怯將汲井賞凝睇久之蓋美色也欲加以非義拒不肯條爾不見惟筠筒在焉

愚書

武廟好微行遇一婦人汲水乃口占一詞云汲水上南坡紅裙映碧波雖然不是俺官娥野花偏豔目村酒醉人多

武宗外紀

錢舜舉有張麗華侍女汲井圖

淵穎集

呂后囚戚夫人於永巷髡衣赭令舂

漢書

梁德后醋忌使貴嬪白春每中程若有助者

南史

江都王宮人有過者令以鉛杵舂

漢書

齊州劉十郎窮賤與妻傭春自給忽一宵春杵中折
凌旦有新杵在曰旁夫婦驚喜自是穿地得隱伏之
貨家累千金以碓杵爲神賜寶藏之

太平廣記

善卷山之東有大石曰茉莉夫人鬼磨傳稱夫人以
磨磨麪供養大眾者或云卽茉莉元君

東還紀程

黃伯英卒妻雍氏織紵市餅以養舅姑嘗攜幼子負
豈至水濱置磨磨之有鄉人奪其磨處雍氏號天慟
哭磨爲不轉其人驚異遂還之

漳州府志

有婦以賣麪爲業得餘麪以資姑貧不能畜彘恒自
轉磨夜夜徹四鼓姑沒後上墓歸遇二少女於路迎

而笑曰同住二十餘年頗相識否婦錯愕不知所對
二女曰嫂勿訝我姊妹皆感嫂孝心每夜助嫂轉不
意爲上帝所嘉得證正果今嫂養姑事畢我姊妹亦
登仙去矣言訖不見婦歸再轉其磨則力幾不勝非
復宿昔之旋運自如矣

薩摩坡雜記

周千秋夫人沈氏簸米見米蟲聚蟲甕中糠栖養之
至秋皆羽化而去

信徵錄

湖州崔四官妻往石坡口淘米被暴雨震死未幾雷
又大作香氣滿室妻遂甦

冥報錄

第五倫妻親執炊爨

東觀漢記

司馬懿辭曹操辟托以風痺嘗曝書過而不覺自起收之惟一婢見妻張恐言洩乃殺之而自執縶焉張名春華卽宣穆皇后自少有智識

晉書

魏元忠婢方縶出外汲水還見老嫗爲其守火

語林

鄭氏兄弟皆文士大比之歲次婦以鏡聽卜有二人初起相推爲戲云汝也涼涼去及闌後兄弟皆歸時暑氣猶盛兩婦在厨下炊飯餉耕甚熱正苦忽有報騎登門報大鄭捷母入厨喚大婦曰大男中矣汝可涼涼去次婦忿惻泣且炊俄又有報二鄭捷者次婦力擲餅杖而起曰儂也涼涼去於是鏡聽乃驗

聊齋志異

有夫自外歸見婦吹火贈詩曰吹火朱唇動添薪玉
腕斜遙看烟裏面一似霧中花

盤洲集

有婦吹火筒中蠟蚣入腹刺猪羊血灌之卽吐出
延壽書

許明奴家有姬入山採樵不歸今人樵或有見姬身
衣藤葉行疾如飛逐之昇林而去

林氏野史

巢氏婢採薪忽有一人隨婢還家不使人見見者惟
婢而已每與婢飲晏輒吹笛而歌

幽明錄

王良爲大司徒司徒史鮑恢過候其家見良妻布裙
曳柴從田歸恢告曰我司徒史欲見夫人受苦妻曰

妾是也苦搵無書恢下拜嘆息

女世說

永樂八年賜寧國長公主柴炭各三萬斤

年山堂別集

官人爐炭用胡麻文鵲鴿青

劍南詩彙

陸續母截肉必方斷慈寸寸無不同

謝朓後漢書

段文昌庖所曰鍊珍堂有老婢掌其饌事

食經

掌饌姬曰鼎娥

修詞指南

宋太祖將北征京師喧言軍中欲立點檢爲天子太祖告家人曰外間洶洶如此將若之何太祖姊方在廚引麪杖擊太祖逐之曰丈夫臨大事可否當白決乃來家間恐怖婦女耶太祖默然而出

語林

齊劉皇后嘗歸寧其營祭食后助炒胡麻未及索火
火便自然南史

昔有婢爲主人炒麥豆羊啗食之婢每杖羊一日空
手取火羊直來舐婢婢急取火著羊脊上羊熱觸突
延燒雜寶藏經

梅聖俞有婢善斫鱸歐陽公等每思食鱸必提魚往
就聖俞家避暑錄話

有士大夫於京師買一妾自言是蔡太師府包子府
中人一日令其作包子辭以不能詰之曰既是包子
廚中人何爲不能作包子對曰妾乃包子廚中縷葱

絲者也 鶴林玉露

蔡姬所造饅頭有慈味而不見慈其法明慈不切入
餡而留饅頭上一竅候其熟卽拔去慈而以麪塞其
竅蔡姬李滄溟侍兒也 文海披沙

嶺南人家教女不以針縷績紡爲功但躬庖廚爲大
好女故爭聘者相語曰吾女裁袍補襖都不會治水
蛇黃鱔卽一條勝一條矣 投荒雜錄

鉉翁欲求一容貌才藝兼全之妾忽有以奚奴者至
姿色固美問其藝則曰能溫酒左右皆笑公漫爾留
試之及執事初甚熱次畧寒三次微溫公方飲旣而

每日並如初之第三次公喜遂納焉終公之身未嘗有過不及時公死囊橐皆爲所有因而巨富人稱曰奚娘子者是也

輟耕錄

蒲傳正諸婦閉戶不治一事惟滴酥爲花果等物每請客一客二十釘皆功巧盡力爲之者只用一次復速客則更之以此諸婦日夜滴酥不輟

師友談記

陳壽遭父喪有疾使婢丸藥鄉黨以爲譏

晉書

楊萬里詩江妃有訣煮真珠菰飯牛酥軟不如

誠齋集

龍輔詩獨詣郎食性廚下自調羹

女紅作志

費鐵騎爲巨帥多行劫掠至一莊吏夫悉竄惟一婦

以杓揮釜湯潑之數十健兒無措狼狽奔散婦但乘

杓據釜畧無所損

女世說

宮中有娠賜暖水釜五箇

武林舊事

夢得新銚銷取婦好也

夢書

鍾允章妻牢氏有賢行貧時家無釜鬻止用一銚後
富貴牢氏出銚以示允章允章慙

十國春秋

何仙姑爲人飯姬故肩扇箴籬

留青日札

二月中和節宮中排辦挑菜御晏先是預備朱綠花
斛下以羅帛作十卷書品目於上繫以紅絲上植生
菜薺花諸品俟晏酬樂作自中殿以次各以金匏挑

之后妃貴人嬈好等皆有賞無罰以次每斛十號五
紅字爲賞五黑字爲罰上賞則成號真珠玉杯金器
比珠篋環珠翠領抹次以鋌銀酒器冠銀翠花緞帛
龍涎御扇筆墨定審定器之類罰則舞唱吟詩念佛
飲冷水吃生薑之類用此以增戲笑

乾淳歲時記

岑琬松陵道中詩了鬢挑菜女

雪崖集

閩宮中有茶樹二株鬱茂婆娑宮人呼爲清人樹春
時嬪嬙戲摘新芽設傾筐會

閩海叢談

潮州燈節飾採茶女十二人手挈花籃而歌余錄其
一首曰三月採茶向水濱娘在房中繡手巾兩頭繡

出茶花朵中央繡出採茶人

嶺南雜記

楊愛愛本錢塘倡家女年十五尙垂鬟性善歌舞七月七日泛舟西湖採荷香傳金陵少年張逞所調相攜潛遁旅於京師逾年逞爲父捕去愛愛留巷中好事者百計圖之不可得後三年念逞不置感疾而死愛愛死小婢子錦兒出其繡手簪香囊繡履數物香皆郁然而新

侍兒小名錄拾遺

女弟子隊有採蓮隊衣紅羅生色綽子繫暈裙戴雲鬟髻乘綠船執蓮花

宋史樂志

陸師道有西施採蓮圖詩

歷代題畫詩類

南宋寒門陳氏有三女無男父病母嫁三女因年饑
自採菱蓴質於市養父人爭欲娶之長女傷慨笄獨
誓不肯行

女世說補

齊書韓靈敏傳作會稽人

玉泉山下西湖中多菱芡帝夏月避暑作採菱小船
縛綵爲棚木蘭爲槳命宮娥乘之以採菱爲水戲時
疑香兒亦在焉帝命製採菱曲歌之遂歌水面剪青
芝調聲滿湖上

元氏掖庭記

郝僊女魏青龍中人年及笄姿色姝麗採蘋水中蒼
煙白霧俄失其所在母哀求水濱願言一見良久異
香襲人隱約波渚問曰兒以靈契托蹟納官陰主水

府世緣已斷毋用悲悵

野客叢書

昔有女子採薇有所驚而走北至回水之上止而得

鹿家遂昌熾

楚辭章句

長山朱郭夫妻採藻澗濱得二銅釜

異苑

宋乾德間象州傲氏女與嫂獨孤氏赴天蓋山採葛
皆墮泉中死經月餘乃於空中呼父母曰吾仙女也
有過謫人間數滿當還

廣西通志

九日婦女以口採茱萸可治心痛之疾

西鄉縣志

章項妻程氏與二女入山採葉程爲暴虎銜去二女
宛叫挽其衣裾與虎爭力虎乃捨之

歙州圖經

昔有貧女採螺見畝螺張口噉其肉貧女死因葬水

旁其冢化爲巨石號螺女石

寰宇記

揭衣山有玉女搗練砧

述異記

張萱有宮人搗練圖

宣和畫譜

班婕妤有搗素賦

古今文致

古者夫婦遠別婦人臨秋必搗衣以寄

騷鴻錄

古人搗衣兩女子對立執一杵如舂米然嘗見六朝

人畫搗衣圖其制如此今則臥杵對坐搗之

藝林伐山

太子納妃有搗衣砧一枚

東宮舊事

祔歸縣屈原文有女娶廟搗衣石尙存當秋風夜雨

之際磔聲隱隱可聽

江陵志

周漢公主病鬼車爲飛至砧石卽斃

本草綱目

太子納妃有搗衣杵十枚

東宮舊事

嵩山有玉女搗帛石立秋前一夜常聞杵聲

嵩山記

杵之神曰細腰庾信詩曰北堂細腰杵

女紅餘志

孔子南遊至阿谷有處子佩璜而浴者孔子抽觴以受子貢曰以觀其辭子貢曰欲乞一飲婦人曰欲飲則飲何問婢子

韓詩外傳

漢有女子浣於水濱有三節大竹流於女子足間聞有聲持破之得一男兒

水經注

婦人無以夫衣合浣之使不利

龍魚河圖

蘇耽母潘氏嘗於江邊浣衣有五色苔浮水揚去復

來繞足者三乃取吞之遂生耽

郴陽仙傳

有女人水次浣濯爲蛟牽入石中經數日雷擊石破

見死蛟及婦人屍

地理記

冀國夫人見一僧衣汚夫人爲濯其衣頃刻百花滿

潭因名百花潭又名浣花溪

吳中復冀國夫人王氏碑記

鄭源令婢萱草浣衣萱草輒云郎君塵土太多令人

手皮俱脫

三峯集

賈似道之父少日舟過颶溪見婦人浣衣者偶調之

遂攜以歸既而生似道

齊東野語

宮人左氏後爲民間浣衣婦能言掖庭舊事

舟車集

遼景宗睿知皇后蕭氏諱綽宰相思溫女早慧思溫

觀諸女掃地惟后潔除喜曰此女必能成家

續文獻通考

戰國策龍陽君釣得十魚而泣前魚注龍陽君幸姬

也長孫左輔于武陵等詩用前魚皆以宮人言之

子史

精華

潘夫人垂釣得大魚乃曰昔聞泣魚今必有愛

拾遺記

汾州有二小女戲釣溪中各得一物若鱸者而毛若

龜者而鰓

續西陽雜俎

蜀李昭儀字舜絃有釣魚不得詩甚工十國春秋

梁蕭棟與其妻執鋤鋤菜三國典畧

唐建中間有村女出耕紫雲常覆其上浙江通志

仁宗曹皇后性慈儉重稼穡常於禁苑種穀宋史

漢中有老嫗年百二十歲晨出田間栽種香齋筆記

徐亞長東莞徐姓婢也奉主命確草豆田中家僮進

旺跡而迫之力拒獲免既而投江死雲宮法語

番婦耕稼辛苦常襁負子而扶犁番社採風圖考

昭陽俗婦人揷秧確菴文稿

峽中婦人足踏水車手猶績麻不置人蜀記

有姑嫂共刈稻姑墜深溝中嫂救之俱溺死葬於溝旁忽生蓮花里人啓視之蓮花皆從口出

揚州府志

東坡在昌化行歌田間僮婦曰內翰昔日富貴一場

春夢坡然之望人因呼爲春夢婆

候鯖錄

官勝娘夫轉田勝娘儘之見一虎方攫其夫勝娘奮

挺擊之虎舍去勝娘負夫歸

泉州府志

衆俗貿易婦女摘負接踵於路男子則不出也

海怪餘錄

辰沅靖州蠻人負物皆束於背

老學菴筆記

惠州婦女挑鹽肩水往來如織屨夫過山輒以女應

紅顏落此真在屏提劫中矣

嶺南雜記

舊史卷四十二

舊史卷四十三

東吳王初桐于陽篡述

蘭陵孫星衍淵如校刊

文墨門一

學術

錢忱妻瀛國夫人唐氏隨其姑長公主入謝欽聖向
后於禁中先有戚里婦數人在焉俱從后過受釐殿
同行者皆仰視讀釐爲離夫人笑於旁曰受禧也蓋
取宣室受釐之義耳后喜回顧主曰好人家兒女終
是別

揮塵後錄

則天后持臆說作爲十九字當時用之天作天地作
坐日作囧月作囧星作○君作風年作垂正作岳臣
作惠照作墨戴作嵐載作貳國作囧初作風證作鑿

授作登人作至聖作壘生作匡

宣和書譜及金苑琳瑯跋浩然雜談

曰唐史則天自制十二字余攷東觀餘論跋華嚴經一段乃復有證聖等字以是而言則武后自制之字其數不可知學林日集韻載則天自制十八字是唐史十二字之外復有六字皆見於薛稷所書之碑

武后稱制徐敬業起兵揚州討之宰相裴炎與敬業

書惟有青鸞字朝臣莫解后曰此青者十二月鸞者

我自與也遂誅炎

唐則天實錄

左芬爲晉武貴嬪姿陋體羸常居薄室然以才德見

禮帝每過之言及文義辭對清華

晉陽秋

郭曖妻昇平公主有才學尤喜詩人曖盛集文士主

必坐視簾中詩美者賞以百縑

女世說

孫夫人幼有淑質李易安欲以其學傳之夫人謝曰

才藻非婦人事也

謂南集

趙凡夫妻陸卿子學殖優於凡夫

經義考

曹世叔妻班昭博學高才兄固著漢書八表天文志

未竟而卒和帝詔昭踵成之數召入宮令皇后諸貴

人師焉號曰大家

後漢書

和熹鄧后博覽五經傳記圖讖內事風雨占候老子

孟子禮記月令法言不觀浮華申韓之書

續漢書

崔寔母博覽書傳教寔臨民

東觀漢記

李白婦博學強記白一日賦詩末云不信妾腸斷歸來看取明鏡前婦曰君不問武后詩乎不信比來常下淚開箱驗取石榴裙將母類乎又一口白自誇草不謝榮於春風木不怨落於秋天之句婦輕颯曰喧然而春榮華者不謝凄然而秋凋零者不憾非劉勰之言乎白深異之

女世說

仁宗曹后博涉經史多授以決事

宋史

顯宗皇后徒單氏喜老莊學純淡清懿

金史

范君和妻姚氏博通羣籍自號青蛾居士

王駕問遠稿

劉妙才博極羣書尤邃於易

敬禎野乘

王端淑字玉映號映然子思任女也博學工詩文順治中欲援曹大家故事延入禁中教諸妃主映然子力辭之

畫徵錄

春秋之世婦人多通達古今如穆姜淫婦人也而其論易隨卦云云夫子作文言取之

居易錄

崔篆母師氏能通經學百家之言王莽竊以殊禮賜

號義成夫人

漢書

夏侯勝以尚書授太后勝卒太后爲服五日

冬夜箋記

梁皇后九歲通孝經論語遂治韓詩大義略舉

續漢書

太始中河南女子得泰誓一篇獻之於伏生

經義考

智瓊嘗注易七卷有卦有象可占吉凶

天上玉女記

韋逞母宋氏家世儒學父授以周官音義宋氏諷誦不輟及徙山東宋氏背負父所授書以行教逞成名十六國春秋

劉聰小劉后殷小女也童齒聰惠晝營女工夜誦書

序母每止之敦篤彌甚與諸兄弟論經義理旨超然

前趙錄 載記曰殷長女英字麗芳小女娥字麗華

宋廷芬五女皆警慧廷芬教以經義

唐詩紀事

蒲鹵母任氏知書里中號任五經

女世說

忠懿王妃孫太真好學通毛詩魯論大義

吳越備史

洪真妻文成縣君李公擇姊也治春秋博學能文黃
山谷公擇甥也有題坡母詩竹絕句云白頭腕中萬
斛力或卽文成耳

居易錄

鄧洵仁女美且賢知經術常隨其母入禁中宮女呼

爲鄧五經

投轄錄

楊直夫之妹通經學嫁虞氏生集爲矩儒其學無師

傳於母氏也

野老記聞

杭州有黃三姑者窮理盡性時徑山有盛名常倦應

接訴於三姑姑曰皆自作也試取魚子來咬著寧有

許鬧事徑山心伏或云夏山姑

唐國史補

班婕妤誦詩及窈窕德象女師之篇師古曰窈窕德

象女師之篇皆古箴戒之書

漢書注

劉子政最重左氏婦女無不誦讀

意林

馬后幼誦易經習詩論尤好讀春秋略記大義讀楚

辭喜賦頌疾其浮華輒摘其要

東觀漢記

宣帝太子令宮人皆誦王褒洞簫賦

延州筆記

和熹鄧后六歲能讀史書十二通詩論語母常非之

曰汝不習女工乃更務學欲舉博士耶后重遵母言

書修婦業暮誦經典家人號曰諸生

後漢書

鄧太后從曹大家受經書兼天文算數

太平御覽

蜀劉炎侍婢數十悉教誦魯靈光殿賦

珍珠船

崔浩妻郭氏好誦釋典

說備

文明王皇后六歲誦詩論特精喪服

王隱晉書

高祖賓后讀女誡列女等傳一過輒不忘

唐書

徐賢妃生五月能言四歲誦詩論卽便通曉

唐詩紀事

喬知之寵婢窈窕好讀書善屬文

本事詩

牛肅女曰應貞少而聰穎年十三凡誦佛經二百餘

卷儒書子史又數百餘卷初應貞未讀左傳夜初眠

忽自誦三十卷一字無遺天曉而畢當誦時其父驚駭數呼之都不答誦已而覺問何故亦不知試令開卷則已精熟矣後遂學窮三教博涉多能著爲文章每夜夢製書而食之每夢食數十卷則文體一變逐工爲賦頌年二十四而卒有遺芳集

宋若昭牛應貞傳

海龍王諸女及姨姊妹六七人歸過洞庭宿於洪饒間有許漢陽者爲龍女所邀龍女口誦威儀一章云海門連洞庭每去三千里十歲一歸來辛苦瀟湘水遂命青衣取諸卷兼筆硯請漢陽錄之

清異記

真宗宴近臣語及莊子忽命呼秋水至則翠鬟綠衣

小女童也誦秋水一篇聞者竦立

蘇軾雜記

吳皇后年十四入宮封新興郡夫人俄進才人又進婉儀讀書萬卷翰墨絕人遂正位宮壺

朝野雜記

曾宏父有雙鬟小顰者頗慧點宏父令誦東坡赤壁賦客至代誦人多稱之後鄭顥道教其小婢亦爲此技曾笑曰此真所謂效顰也

揮塵後集

宋方微孫著女教十章以便女子誦習

鐵網珊瑚

金顯宗劉后過目不忘讀書經旬日終卷

宣文獻通考

甘棠妓溫琬字仲圭本良家子六歲訓以詩書日誦萬言能通大義張公靖贈之詩云桂枝若許佳人折

應作甘棠女狀元

青瑣高議

徐彩鸞通經史每誦文天祥六歌必感泣後爲賊所執至桂林橋投水其詩曰惟有桂林橋下水千年猶

照妾心清

女世說

賈姬雅好讀史一夜讀至舜誅四凶曰堯舜之世何物四凶敢爾忽牕外有四鬼各道姓名曰某某在此啟戶視之寂無所見

皇華紀聞

黃幼藻臨終猶誦殘燈無焰影幢幢之句

姚旅露書

夏雲英五歲聞誦孝經七歲盡通釋典

誠齋新錄

宗定九母少聞家教讀五經周禮孝經女孝經諸書

兼通通鑑二十一代史有訓子詩六章

今世說

葉小鸞四歲能誦離騷

改讀野乘

葉紕統三歲能朗誦長

歌 午夢堂集

陳小憐年十四通朱子綱目

變雅堂集

焦仲卿妻十六誦詩書

詩紀

左思嬌女詩執書愛綈素誦習矜所獲

玉臺新詠

羅公升春日夫人閣詩碧紗牕下讀毛詩

滄洲集

姜夔陳日華侍兒讀書云繹句尋章久未休花房日

晏不梳頭

白石道人集

洪玉父有侍兒曰小九知書能爲洪檢閱

荊坡叢話

李易安與夫趙明誠並研窮書史每獲一書易安卽
日勘校裝輯得名畫彝器亦摩玩舒卷指摘疵病盡
一燭爲率故紙札精緻字畫全整冠於諸家每飯罷
夫婦坐歸來堂烹茶指堆積書史言某事在某書某
卷第幾頁第幾行以中否勝負爲飲茶先後中則舉
杯大笑或至茶覆杯中不得飲而起

經籍會通

河東君校讐羣書繙閱爛熟雖縹緲浮棟而某書某
卷拈示尖籤百不失一

柳南隨筆

魏武以金贖蔡文姬於匈奴問之曰聞夫人家先世
多墳籍猶能憶識之否文姬曰昔亡父賜書四千許

卷罔有存者今所誦憶裁四百餘篇於是繕寫送之

文無遺誤

何氏語林

廬道虔妻元氏甚聰悟嘗升堂講老子道德經道虔

弟元朗隔紗幃以聽之

郡洛陽時記

趙定母多通詩書常聚生徒數十人張帷講說儒生

登門質疑必引與坐問發與義咸出意表

女世說

南唐鍾謨女博通孔老書尤善講說後爲洞真宮女

道士名守一

江南錄

耆州有女僧姿容明悟能講無量壽經

十國春秋

東坡與小妹黃山谷論詩妹云輕風細柳澹月梅花

中要加一字作腰成五言聯句坡云輕風搖細柳澹
月映梅花妹云佳矣未也黃云輕風舞細柳澹月隱
梅花妹云佳矣猶未也坡云然則妹將何說妹云輕
風扶細柳澹月失梅花二人稱善

陳日華詩話

周綺生名文口多微詞值宴集分韻有用習家池者
綺生笑曰無乃太遠乎舉座拂衣起綺生嘗有詩云
掃眉才子多相忌未敢人前說較書

本事詩

李氏廖愈達妻也好讀書通詩書大義每女紅閒則
持文孝經女小學爲二妾講章句大義旁及古今貞
淫善惡感應事二妾日供茶果聽講愈達一日自外

歸聞講書聲竊聽之則李氏教二妾識仁字語諄諄不休愈達入而笑李氏正色曰志士仁人有殺身以成仁毋求生以害仁

魏叔子文集

武陵黃夫人顧氏名若璞所著文集多經濟大篇有西京氣格常與婦女宴坐卽講究河漕屯田馬政邊備諸大計副笄中乃有此人亦奇

歸月軒集跋

中宗正月晦日幸昆明池賦詩羣臣應制百餘篇帳殿前結綵樓命上官昭容選一首爲新翻御製曲從臣悉集其下須臾紙落如飛各認其名而懷之旣退惟沈宋二詩不下又移時一紙飛墜競取而觀乃沈

詩也乃聞其評曰二詩工力悉敵沈詩落句云微臣彫朽質羞都豫章才蓋詞氣已竭宋詩云不愁明月盡自有夜珠來猶健舉沈乃服

景龍文館記

王安石女見覺範詩曰此浪子和尙耳

能改齋漫錄

李易安論列諸詞家排擊無一免者

香溪漁隱叢語

孟淑卿才辨工詩自以配不得志號曰荆山居士嘗論朱淑真詩曰作詩須脫胎化質女子無鉛粉氣乃佳朱生故有俗病

異林

周玉簫好談古今節義事嘗採古列女懿可法佚可

戒者各爲詩一篇比於彤管

吟堂集

徐小淑論詩獨不喜子美謂多俚語易入學究

林下詞選

方夫人維儀有宮閨詩評一卷

然脂集

吳吳山三婦合評牡丹亭其評無一不佳

虞初新志

王凝之妻謝道韞聰識有才辨叔父安嘗問毛詩何句最佳答曰穆如清風安謂其雅人深致

晉書

女子紫竹工詞一日于李後主集其父問曰後主詞中何語最佳答曰問君能有幾多愁恰是一江春水向東流耳

女世說

伏生女代父授鼃錯尙書二十九篇

漢書

鄧后以經傳教授宮人左右習誦朝夕濟濟

東觀漢記

漢書始出多未能通者馬融伏於閣下從班昭受讀

班昭教以讀法

羣書考索

世宗李婕妤好在宮常教帝妹書誦授經史

後魏書

閔秀韓玉父秦人家於杭李易安教以詩

四朝詩集

沈瓊蓮宮詞專把經書教小王

明脂瑛

上官昭容名婉兒綽有文詞明習吏事百司表奏多

令參決中宗即位又令專掌制命

唐書

薛嵩家有青衣紅線者通經史詩俾其掌牋表號曰

內記室

劉餗傳

曾文肅爲懷仁令有張氏小女甫六七歲甚爲惠黠

魏夫人憐之教以誦詩書頗通解其後南北睽隔紹
聖初文肅柄事樞是時張氏已入禁中忽與夫人相
聞夫人以夫貴封瀛國稱壽禁庭始相見叙舊自後
歲時遺問夫人歿張作詩哭之云香散簾幃寂塵生
翰墨閑空傳三壺譽無復內朝班

揮塵後錄

郝文珠字昭文貌不魁而多才藝李寧遠鎮遼東聞
其名召掌書記凡奏牘悉以屬焉

弁山樵暇語

謝三娘不識字宋時謠也

江湖載酒集

書籍

竇太后好黃老書

史記

帝見王母巾箱中有一卷書盛以紫錦之囊帝問之
王母曰此五嶽真形圖也

漢武帝內傳

九華安真妃侍女著朱衣帶青章囊手持錦囊盛書
書可十餘卷白玉檢囊口上刻字云玉清神虛內真

紫元丹章

真誥

沈皇后諱嫫華聰敏強記時張貴妃寵傾後宮後主
遇后既薄后惟尋閱圖史佛經爲事

六朝通鑑博議

太平公主愛樂毅論則天與以織袋盛置箱中及籍
沒咸陽老嫗竊去縣吏搜捕嫗驚懼投之窰下香聞
數日

珍珠船

崔元亮於京都買得研神記一卷有昭客列名書縫

處呂溫因賦上官昭客書樓歌

唐詩紀事

神宗以呂坤閏範賜鄭貴妃貴妃侈上之賜製序重刊頒之中外而忌坤者謂坤以此書私通貴妃貴妃答以寶鑑五十采幣四端

情學案

周玉簫孩提時每啼哭以書帙示之卽止

文奇豹班

鄭妥娘手不去書朝夕焚香持課

秦淮四美人選稿

翁孺安號靜和居士不事鉛華室惟書籍

浣花居遺稿

米小大涉獵文藝粉指墨痕縱橫縹帙

板橋雜記

山陰沈躬範婦陳夫人好讀書年二十三夭卒之日

囑以平日所誦書籍殉冢中

湖海樓集

董姬閱詩無所不解而又出慧解以解之坐處書周
左右午夜衾枕間猶擁數十家唐詩而卧

影梅菴憶語

高啓有二喬觀兵書圖詩

大全集

太子妃有漆書臺

東宮舊事

著作

班婕妤集一卷班昭集三卷

漢書藝文志

列女傳十五卷曹大家注

崇文總目及曾鞏目錄序

班昭作女誡七篇馬融善之令妻女習焉

後漢書

曹大家有女孝經今所傳女孝經乃唐人借名大家

曹書已亡逸矣

經籍會通

賈充妻李氏作女訓行於世

世說

趙姬作列女傳解號趙母注

世說註

馮太后以高祖富于春秋作勸戒歌三百餘章又作

皇詔十八篇

魏書

品彙載劉令嫺以爲唐人按劉令嫺者徐悱之妻隋

書經籍志有梁婦人劉令嫺集二卷

延州筆記

范靖妻沈滿願有集三卷

唐書藝文志

漢以下婦人文集據諸家書目所存者晉武帝左貴
嬪集四卷太宰充妻李扶集一卷司徒王渾妻鍾夫

人集五卷都尉陶融妻陳窈集一卷都水使者妻陳
玠集五卷海西令劉麟妻陳珍集一卷劉柔妻王郎
之集十卷常侍傅伉妻辛蕭集一卷成公道賢妻龐
馥集一卷松陽令鈕滔母孫瓊集二卷太守何殷妻
徐氏集一卷王凝之妻謝道韞集二卷宋婦人牽氏
集一卷後宮司儀韓蘭英集四卷梁武帝女臨安公
主集三卷陳後主沈后集十卷隋劉子政母祖氏集
九卷

少室山房詩數

文德后長孫氏嘗採古婦人善事勒成十卷名曰女
則自爲之序

唐書

玉海作女則要錄

唐武帝垂拱集一百卷金輪集十卷

舊唐書

列女傳一百卷古今內範一百卷內範要錄十卷鳳

樓新誠二十卷俱則天后武氏撰

陝西通志

上官昭容有文集一百卷

龍城錄

女訓十七家有孫夫人序讀一卷

唐書藝文志

宋若莘著女論語十篇以韋逞母文宣君宋氏代仲

尼以曹大家等代顏閔問答悉以婦道其妹若昭又

爲傳申釋之

女論語後序

王博妻楊氏女誡一卷

國史經籍志

謝希孟集二卷湖景山之女嫁陳安國

邵齊讀書志

女子胡惜黃庭五藏內景圖一卷

暇老齋雜記

處士女王安之集一卷安之名尙恭簡池王君之女

年二十未嫁而死

書錄解題

章溫女續曹大家女訓十二章行於世

世中秘

武康常陽細君龍氏善屬文外父家多異書女紅之

暇輒紉繹之擇其當意者編成女紅餘志

文紅餘志小引

易安居士與夫趙明誠撰金石錄

臨城縣志

錢唐曹妙清三十不嫁文章與風陳俱邁嘗持所著

詩文偕乳媼訪楊維禎於洞庭太湖間爲歌詩鼓琴

以寫山川荒落之悲引闌睢雉朝琴操以和白雪之

章維楨大賞叙爲曹氏絃歌集

女世說

李公昂妻陳氏著作最富有贈五臺尼姑雪秀峰詩

甚工

詩話類編

仁孝徐皇后中山王達長女后觀女憲女誠諸家約

其要義作內訓二十篇

名山藏

仁孝后詩集一卷貞烈事實二卷章聖太后女訓一

卷慈聖太后女鑒一卷

國史經籍志

王玉映所著有吟紅留侯恒心諸集輯名媛文緯詩

緯歷代帝王后妃古今年號名史愚

名媛文緯

沈靜專字曼君宛君之妹適吳適之所著名適適草

別撰頌古一卷

靜志居詩話

蔣烈婦者姜士進妻也讀書能文士進死婦濡首水

缸中亦死有續劉向列女傳

丹陽志

梁氏鄭嬭旁掖羣書梨爲八史自以爲女董狐一外

史二國史三隱史四烈史五才史六韻史七艷史八

誠史

古今女史序

草衣道人王修微性好山水撰名山記

許玉斧修微道人生誌銘

葉璿工詩每聞古名媛傳記各繫以詩凡百首曰停

針論古傳述

福清縣志

秦淮董姬名白字小宛才色擅一時後歸如臯冒推

官居艷月樓集古今閨幃軼事薈爲一書名曰奩艷
分上中下三卷姬後天葬影梅菴旁

有沙集

董姬遍閱羣書於事涉閨閣者輒錄之書成名曰奩
艷其書瑰異精秘凡古今女子自頂至踵以及服食
器具亭臺歌舞針神才藻下及禽魚鳥獸草木之類
皆歸香麗

影梅菴憶語

沙宛在字嫩兒桃葉女郎有蝶香集

白門集

班昭補列女傳一卷班昭幽通賦註一卷蘇惠璣
圖一卷侯莫陳邈妻女孝經一卷顏浩女本經一卷
沈儼諧史一卷鄭氏女教篇一卷楊慎妻黃氏錦字

書一卷王鳳嫺東歸紀事一卷邢慈靜黔途略一卷
徐淑英女誠雜論一卷徐德英革除紀一卷顧若璞
往生紀實一卷倪仁吉宮意圖題語一卷季嫺學古
餘論一卷季嫺前因紀一卷陶姪儀放生約一卷

集

然脂

卷四十四

東吳王初桐子陽蕙述

上海趙秉淵少鈍校刊

文墨門二

詩

列女傳以茱萸爲蔡人妻作汝墳爲周南大夫妻作
行露爲申人女作栢舟爲衛宣夫人作燕燕爲定姜
送婦作式微爲黎莊公夫人及其傅母作大車爲息
夫人作

經義考

采葛之婦傷越王用心之苦作若之何詩

吳越春秋

蘇武作錄別詩其妻因賦答外詩

修辭銜鑑

班姬團扇辭旨清捷怨深文綺得匹婦之致

詩品

蔡文姬歸董祀後感傷亂離作悲憤詩

後漢書 詩 諸日文姬詩

真情極切自然成文

蔡文二詩明白感慨類世所傳木蘭詩東京無此格也又文姬流離在父沒之後董卓旣誅乃遇禍今此詩乃云爲董卓所驅虜入胡尤知非真也蓋擬作者疏略而范氏荒淺遂載之本傳耳

東坡志林

蔡文詩或疑爲非真此蓋未嘗詳考於史也

蔡寬夫詩話

劉孝綽諸妹有夫人之目

詩品

王淑英婦劉孝綽之妹春日淑英之官劉不克從寄
詩曰粧鉛點黛拂輕紅鳴環動佩出房櫳看梅復看
柳淚滿春衫中

林下詩談

劉令嫺盛有才名玉臺新詠載令嫺詩如光宅寺云
長廊欣目送廣殿悅逢迎何當曲房裏幽隱無人聲
又有期不至云黃昏信使斷銜怨心悽悽迴燈向下
榻轉面閣中啼正如高仲武所云形質旣雌詞意亦
蕩者也

池北偶談

范靖同妻沈氏至後園觀酒翠池又上洗心亭共爲
映水曲沈氏先成曰輕髻學浮雲雙蛾擬初月水澄

正落釵薛開理垂髮靖奇之不復敢作

林下詩談

如意中女子七歲能詩則天試之皆應聲而就其送兄詩云別路雲初起離亭葉正稀所嗟人異雁不作

一行飛

唐宋遺史

唐中宗引名儒賜晏賦詩婉兒常代帝及后長寧安

樂二公主淑篇並作而采藻益新

景龍文館記

樂昌孫氏孟昌期妻也工吟咏代夫作燭詩琴詩酒

詩一日曰才思非婦人事也併焚其集

唐詩紀事

劉長卿謂季蘭爲女中詩豪

全唐詩話

四秀集朱

薛濤爲元稹所喜酒後爭合以酒器擲傷公猶子遂

出幕作十離詩以獻乃復留焉

鑑戒錄

簡池志載薛濤江月樓詩秋風彷彿吳江冷鷗鷺參
差夕陽影垂虹納納卧譙門雉堞耽耽俯魚艇陽安
小兒拍手笑使君幻出江南景又西崑詩凭闌却憶
騎鯨客把酒臨風手自招細雨聲中停去馬夕陽影
裏亂鳴蜩二首新都抄本所無

蜀中詩話

奉慈寺號國夫人宅也楊敬之小女年十三題詩此
寺自稱關西孔子二十七代孫字德隣

寺塔記

獨持巾櫛掩元關水帳無人燭影殘昔日羅衣今化
盡白楊風起隴頭寒是耿將軍青衣所作見廣記而

品彙以爲臺城妓詩非也二酉綴遺

花蕊夫人入宋見太祖使陳所作因誦其亡國詩云
君王城上監降旗妾在深宮那得知四十萬人齊解
甲曾無一个是男兒太祖嘉賞之後山詩話

李茂復內子甚妬晚年有詩云近來不作顛狂事免
被冤家惡眼看南部新書

程頤母侯氏詩獨存夜聞鳴雁一篇宋文鑑

劉希孟詩隱約深厚有古幽閒淑女之風歐陽文忠集

暨氏女子十歲賦野花云多情樵牧頻參首無主蜂

鶯任宿房觀者知其後不保貞素春渚紀聞

王綸女爲鬼所憑有雪詩云何事月娥欺不住亂飄
瑞葉向人間說云天上有瑞木開花六出

中山詩話

一女子爲鬼物所憑作金山詩云濤頭風滾雪山脚

石蟠蚪

困學紀聞

竇梁賓工詩盧東表錄而錄之

補侍見小名錄

楊樸妻送樸赴召詩更休落魄耽杯酒且莫猖狂愛
詠詩今日捉將官裏去這回斷送老頭皮

漁隱叢話

王元甫妻謝氏送別詩此去惟宜早早還休教重起
望夫山君看湘水祠前竹豈是男兒淚染斑

青瑣集

并門徐帥屬內子能詩林子中爲帥每首唱徐密寫

歸衆方操觚內子詩已來必有可觀

者舊積聞

趙明誠妻李氏善屬文於詩尤工如詩情如夜鵲三
遙未能安頗膾炙人口

風月堂詩話

今代婦人能詩者前有曾夫人後有易安

詩說傳承

李易安有詩云兩漢本繼紹新室如贅疣所以嵇中
散至死薄殷周中散非湯武得國引之以比王莽如
此等語豈女子所能

朱子游藝論

許義方常出經年始歸妻劉氏曰自君之出閉門自
守時作小詩以適情耳義方欣然取詩觀之首篇云
月夜招隣僧閒話

拈字錄

天聖中有三英集三英者三哲婦之詩也

詩話總龜

三英詩劉元載妻早梅云南枝向暖北枝寒一種春風有兩般憑仗高樓莫吹笛大家留取倚闌干簷光茂妻寄遠云錦江江上探春回銷盡寒冰落盡梅爭得兒夫似春色一年一度一歸來趙晟母惜別云暖有花枝冷有冰佳人後會却無憑預愁離別苦相對挑盡漁陽一夜燈

歷代吟譜

早梅詩又見摘遺

楊妹子題馬遠畫語關情思人或譏之

書史

楊妹子有題劉松年琴鶴圖詩

真蹟實錄

吳郡薛氏二女蘭英蕙英聰慧能詩見鐵崖西湖竹

枝詞乃效其體作蘇臺竹枝十章

本事詩

管夫人奉中宮命題所畫梅詩云雪後瓊枝嫩霜中
玉蕊寒前林留不得移入月中看

吟堂博笑集

孫淑字蕙蘭能詩歸傳汝礪五月而卒家人出其稿
爲編集成帙題曰綠牕遺稿

清江集

新淦范氏婦早寡召入禁中數年一日題老婦牧牛
圖云貴如潑淚馬嵬坡出塞昭君怨恨多爭似阿婆
牛背穩笛中吹出太平歌高后見之曰彼不樂居此
矣封爲夫人厚賚而遣歸

霞外塵談

鐵鉉死後二女入教坊數月終不受辱有鉉同官至

二女爲詩以獻文皇乃赦出之皆適士人

震澤紀聞
史乘考

誤曰二詩必出好事者

潘應昌女自署其詩曰女郎碧天道人

赤城新志

黃安人楊慎室寄夫詩云雁飛曾不到衡陽錦字何

由寄永昌三春花柳妾薄命六詔風烟君斷腸曰歸

曰歸愁歲暮其雨其雨怨朝陽相憐空有刀環約何

日金雞下夜郎

淑秀集
梅花草堂筆談黃安人詩
獨建旗鼓雄視一時

楊用修戍滇黃安人作詩寄之用修詩云易求海上

瓊枝樹難得閨中錦字書

藝叢

槎雲姓張氏杭州女子有句云殘風殘雪斷橋邊其

兄見之曰我妹必以詩傳但福薄耳

孫振孫槎雲傳

陸女名涓代父送行云津亭楊柳碧粼粼人醉東風

酒半酣萬點落花舟一葉載將春色過江南

說詩樂趣

周潔字玉如家胭脂巷中年十四歸張鳴鳳張歸臨

桂數年後詒父書寄雲巢詩一冊

金陵項事剩錄

孔少娥字文淑賦西湖詩最工

惠州西湖記

景翩翩字驚鴻建昌妓有散花吟王伯穀題云閨中

有女最能詩寄我一部散花詞雖然未見天女面快

語堪當食荔枝

靜志居詩話

姚淑字仲淑工詩有鍾山秀才海棠居集

明詩綜

武林女子梁小玉七歲依韻賦落花詩甚工

秋名雜編

王嬌鸞與周廷章善往還詩詞最多後廷章負盟別

娶鸞遂自殉

林下詞選

閨詩有英氣者王秀重女詠蘭相如是也

西臯外集

茅止生姬人楊宛有詩集名鍾山獻

樊榭山房集

孫瑤華字靈光汪仲嘉有代蘇姬寄怨所懽詩詞客

屬和盈帙靈光詩一出歎皆擱筆

名媛集

邢妹者邢子愿之妹工詩有非非草一卷

名閨珠王

董少玉嫁周元孚學詩既成元孚欲序而行之少玉

笑曰妾幸爲君婦得稍知詩亦不幸爲君婦卽有一

二佳句人必以爲出君手也何以詩爲雙橋隨筆

徐小淑詩高自標位陸卿子詩幽清古澹

梅花草堂筆談

方夫人曰徐小淑與陸卿子唱和稱吳門二大家然

小淑所著絡緯吟視卿子尤猥雜

宮闈詩評

鄒養貞詩篇什嚴整其女秀蘭亦工詩

士齋集序

吳巖子名山卞琳配詩文甚富兼工書法女夢珏字

元文亦能詩

漁洋山人集詩次女德基工畫

今世說曰長女元文工

崔重文字媚兒一字媽然南院妓別黃元龍云楓落

鴉翻秋水明長橋獨樹古今情尋常歌板銀罍地從

此傷離不忍行

胭脂幾

張同字觀若金陵妓以帆影詩得名

宮閒詩選

朱無瑕字泰玉桃葉渡邊女子工詩善書已酉秦淮
有社會泰玉詩出人皆自廢

續佛齋集

許妹狀元許筠妹也七歲能詩號女神童有遊仙曲
三百首

吳子魚朝鮮詩選

無瑕詩美麗婉轉世無其匹

彤管遺編

無瑕寄夫詩意調卓邁

閨閣詩評

趙媛妾李氏號玉峰主人與許妹爲翰墨交詩如兩
兩鷓鴣失舊磯銜魚飛入菰蒲去亦佳句也

玉臺文苑

姚娟娟五歲能詩年十五積詩八百首一一以蓮花

箋書之

西堂雜俎

嘉興妓顧娟娟時作小詩以書法不工偶對人口占而已

吏隱錄

劉啖度妻馮氏詩甚清婉春日卽事云閑步小橋東黃鶯處處逢梨花風雨後人在綠楊中

隴蜀餘聞

沈紉蘭仲女雙惠字柔嘉髫年禪悅有詩云迦陵可解西來意又報人間夢不長年十六而卒

雲薊淡墨

陸姬孟珠名燕燕蘇州人或曰嚳城大家女曾爲侯門寵伎侯裁於法姬流落江海間凄然擁髻有東京夢華想製詩一卷自名紅衲道人

婦人集

沈宜修字宛君吳江葉仲韶妻也長女曰紈紈幼女
曰小鸞皆能詩小鸞字瓊章一字瑤期年十七未嫁
而天紈紈以哭妹死宛君神傷亦卒仲韶集宛君之
詩曰鴈吹紈紈曰愁言小鸞曰返生香

午夢堂集

葉小鸞十二歲解賦詩

敬禎野乘

黃媛介字皆令其詩絕去閨閣畦徑姊媛貞字嘉德
亦能詩

無聲詩史

國雅李雲田曰海內閨秀惟黃

皆令朱中楣二人而已

顧若璞嘗於食頃作七夕詩三十七首

今世說

女郎倪仁吉善畫尤工篇什有宮意圖詩云怨入蒼
梧斑竹枝瀟湘渺渺水雲思分明記得華清夜疎雨

銀缸獨坐時

池北偶談

顧姒字啟姬適鄂生著靜御堂集九日鄂與同人飲限蟹字韻鄂詩顧代作也末云予本澹蕩人讀書不求解爾雅讀不熟蚺蜺誤爲蟹

夢蕉詩話

周羽步與吳蕤仙善著有比玉新聲集

婦人集

袁彤芳年十四作遊仙詩自稱廣寒仙客

林下詩談

寶意有女曰可字長白有才而天寶意編其集曰雲

花一現集

隨園詩話

美人詩意圖孫尙子畫

公私畫史

女子周禧畫惜花春起早詩意十女極工

香祖筆記

杞殖死其妻援琴作歌曰樂莫樂兮新相知悲莫悲

兮生別離

水經注

杞梁妻者杞植妻妹朝日之所作也朝日悲姊之貞

作歌名曰杞梁妻

中華古今注

越王夫人作烏鵲歌

吳越春秋

項羽美人名虞常幸從及羽兵敗自爲歌詩美人和

歌曰漢兵已略地四面楚歌聲大王意氣盡賤妾何

耶生遂自殺

漢春秋

王伯厚曰虞美人歌已是五

供儂歌晉石崇妓綠珠所作

碧雞漫志

劉采春浙女嘗作囉唢曲卽望夫歌也

文言

遼末國半入於金天祚主畋遊如故蕭文妃作歌以
諷曰可憐往代兮秦天子猶向宮中兮望太平天祚
見而銜之

女世說

郭貞順周伯玉妻明初俞良輔征諸寨貞順製長歌
名俞將軍引獻之麾下良輔歛兵而回

名媛彙編

安世房中樂高祖唐山夫人所作

漢書詩譜曰安世歌質古文雅劉

元城語錄曰房中樂格頗高嚴規模簡古

唐山夫人唐山姓也婦人能爲祠祀樂章非嘲風弄
月之比其後則戚夫人暮春歌烏孫公主悲愁歌文
君白頭吟明妃怨詩皆聞夫人風而興起者夫人之

前惟屢屢一歌垓下數語而已

困學紀聞

鄭允端古風有晉魏風致

宋元詩集

漢婦人爲三言詩者蘇伯玉妻四言者王明君五言者卓文君班婕妤徐淑六言者容華夫人七言者趙飛燕八言九言者烏孫公主

少室山房詩叢

陳後主令張貴妃孔貴人等八婦人劈綵牋製五言詩令江總孔範等十客繼和

詞譜典故

李易安上樞密韓公五言古詩工部尙書胡公七言古詩不愧作手

雲麓漫鈔

河東君長于近體七言

觚賸

安南將軍竇滔之襄陽恨妻蘇若蘭妬不與偕蘇自傷因織錦迴文錦縱廣八尺題詩八百餘言縱橫反覆皆成文章名璇璣圖讀者不能盡通若蘭笑謂人曰徘徊宛轉自成文章非我佳人莫之能解遂命蒼頭齎至襄陽滔省覽錦字感其妙絕因迎至恩好甚重

女世說

嘯虹筆記婦人能文者當以若蘭爲冠

若蘭名蕙姓蘇氏陳留令道質季女也年十六歸扶風竇滔滔字連波仕苻秦爲安南將軍以若蘭才色之美甚敬愛之滔有寵妾趙陽臺善歌舞若蘭苦加捶楚由是陽臺積恨譏毀交至滔大恚憤時詔滔鎮

襄陽若蘭不願偕行竟挈陽臺之任若蘭悔恨自傷
因織錦字爲回文五彩相宣瑩心眩目名曰璇璣圖
亘古以來所未有也乃命使齎至襄陽感其妙絕遂
送陽臺之關中具與從迎若蘭於漢南恩好逾初其
著文字五千餘首世久湮沒獨是圖猶存唐則天后
常厚圖首今已魯魚莫辨矣初家君宦遊浙西好拾
清玩凡可人意者雖重購不惜也一日家君宴郡倅
於壁間見是圖償其值得歸遺余於是坐卧觀究因
悟璇璣之理試以經緯求之文果流暢益璇璣者天
盤也經緯者星辰所行之道也中留一眼者天心也

極星不動蓋運轉不離一度之中所謂居其所而斡旋之處中一方太微垣也乃疊字四言詩其二方紫微垣也乃四言回文二方之外四正乃五言回文四維乃四言回文三方之外四正乃交首四言詩其文則不同也四維乃三言回文三方之經以至外四經皆七言回文詩可周流而讀者也

朱淑真璫璣圖記

蘇蕙織錦回文詩則天記云二百餘首楊文公讀至五百餘首明僧起宗分爲七圖一百四十七段得三四五六七言詩至三千七百首

居易錄

范陽盧某母瑯琊王氏於景龍中撰天寶迴文詩凡

八百一十二字誠其子曰吾沒之後爾密記之若逢
大道之朝遇非常之主當以真圖上獻至元宗朝東
平太守始上之 五雜俎

耶律氏小字常哥能詩文不苟作耶律乙辛愛其才
屢求詩常哥遺以回文乙辛知其諷已銜之 遼史

雲間舒大才春夜見一美人姿容妍麗偕二婢嬉遊
於月下生乃揖曰娘子居何處夜行至此美人笑曰
敝居咫尺願枉駕一顧大才遂與美人先後而行不
半里許遙見竹戶荆扉花木掩映明牕淨几亦甚整
潔美人遜生上坐命侍婢獻茶繼以酒饌盃盤精緻

壁間挂四時迴文詩美人自製也大才詢以姓名美人曰妾姓花小字蕤真大才與之狎美人曰君能廢此四時詞乃可大才援筆和之是夜就寢極講幽歡天明起視乃一古祠中塑美人列侍二婢案上朱書木牌題曰花蕤夫人

花史

成都妓單氏贈陳希夷詩云帝王師不得日月老應難名士都稱之

唐宋遺史

徐忻詩年來是事消磨盡只有青山好靜看僕記雜說載一婦人詩云年來萬事灰人意只有看山眼不枯語工於徐

野客叢書

近世婦人能詩往往有臻古人者張奎妻長安縣君
王荆公之妹也佳句云草草杯盤供笑語昏昏燈火
話平生劉天保妻平甫女也句有不緣燕子穿簾幙
春去春來可得知

隱居詩話

吳正獻夫人最能文嘗雪夜作詩云夜深人在水晶
宮

紫薇詩話

婦人曹希蘊詩時有巧語題墨竹云記得小軒岑寂

夜月移疎影上東牆

東坡詩話
格不高惟墨竹詩最工

溫叟詩話希蘊詩

趙明誠妻李氏有云露花倒影柳三變桂子飄香張

九成

老學菴筆記

女子沈清友咏漁父云起家紅蓼岸傳世綠蓑衣得

下字之工

隨隱漫錄

李氏女能詩有集其警句云桃花一簇開無主終不

留題雀護詩

吳中往哲記按二句亦見鄭允端蕭維集

金陵有徐姬者善屬詩早死有句云楊花到處春陰

薄清冷不勝單夾衣頗有婉思

嘆嘆集

嚴伯玉妻鄒淑芳早卒有詩曰三生石草句如玉簫

舊譜回文句瑤瑟新絃續命絲婉約可誦

彤管新編

沈純父端午召客呼周綺生侑酒不至次日始來純

父卽景以五月六日爲題令綺生賦詩綺生朗吟云

酒剩蒲觴冷門懸艾虎新

翠樓集

馬氏虎關將家婦有秋閨夢戍詩一百首宋比玉得其集於荒村老屋中見芳草無言路不明之句爲之擊節

香魂集

南康陳敏政之女善詩如深院雪消芳草綠小園風過落梅多情致幽絕

淑秀集

紀映淮字阿男金陵人嫁莒州杜氏早寡守節終秦淮柳枝云栖鴉流水點秋光佳句也

漁洋詩話

鄂幼輿室人顧啟姬在京時有花憐昨夜雨茶憶故山泉之句一時艷稱之

西陂類稿

金章宗元妃李師兒識字知文義章宗作梳粧臺於
宮中與李妃夜坐上曰二人土上坐妃卽對曰一月
日邊明上大悅 金臺集

新淦范氏能詩有對聯云墨落杯中一片黑雲浮琥
珀梳橫枕上半輪殘月照琉璃 西園雜記

王鳳嫺字瑞卿號文殊雲間人垂髫時大父試以駢
句云秀眉新月小卽應聲曰鬢髮片雲濃 名媛彙編

高文良公咏白燕云有色何曾相假借未對夫人代
對曰不羣仍恐太分明蓋規公之孤立也 秋檠錄

葉小鸞十歲與母初寒夜坐母云桂寒清露濕卽應

云楓冷亂紅凋咸喜其敏捷不知其天徵也

續詩聞

有塾師聚徒於家好出句命對一徒於暮春來從師
卽出句云四野綠陰迎夏至徒愕然次早對云一庭
紅雨送春歸師知其倩筆詰所自來云吾姊也詢其
年及笄矣紉餘輒觀書作字無間寒暑是晚師復出
句云好書勤誦讀次早對云佳句費推敲翼日隣友
招師看桃花又出句云有約看桃塢次早對云無心
坐杏壇師大恚女姓嚴氏貌嫺麗後以所字匪人鬱
鬱病瘵未嫁而卒

柳南隨筆

朱淑真同時有魏夫人者曾子宣內子也亦能詩嘗

置酒邀淑真命小鬟隊舞因索詩以飛雪滿羣山爲韻淑真醉中援筆賦五絕句

宋詩紀事

宋亡汪元量奉三宮留燕甚久後南歸宮人王昭儀

清惠以下二十九人分韻賦詩以餞其行

金臺集
遂昌雜錄

日汪水雲從謝后北遷老宮人能詩者皆水雲指教

水雲金臺告行一時同人以勸君更盡一杯酒西出

陽關無故人分韻賦詩爲贈王清惠得勸字陳淑真

得君字黃慧真得更字何鳳儀得盡字周靜真得一

字葉靜慧得杯字孔清真得酒字鄭惠真得西字方

妙靜得出字翁懿淑得陽字章妙懿得關字蔣懿順

得無字林順德得故字袁淑正得人字

湖山類藁

張瓊英宋宮嬪也歿於沙漠送琴客汪元量南還釀
酒城隅鼓琴叙別瓊英爲詩曰今朝且盡穹廬酒後
夜相思無此杯

女世說

洪夢梨字葢仙號白雲道人江陰女子也才色雙妙
往來多名士吳靜川招同人分韻賦詩以寄道人道
人各依韻和之皆秀麗可誦

柳南隨筆

蘇老泉一日家集舉冷香二字一聯爲令倡云水向
石邊流出冷風從花裏過來香小妹云叫月杜鵑喉
舌冷宿花胡蝶夢魂香

金玉詩話 優古堂詩話能
改齋漫錄皆云叫月宿花二

句一士人詩也

王綸女年十八歲一日晝寢忽聞聲父急問之已起
謂父曰與汝有洞天之緣降人間四百年矣今又會
此自是謂父曰清非生自稱曰燕華君初不識字忽
能詩每與清非生倡和至百餘篇

女仙傳

黃皆令避兵播遷有下處士妻吳巖子以詩名假館
留數月爲文字交與諸大家名姝靜女倡酬有越遊
集

學餘堂文集

李侍郎與遠山夫人朱中栢有文江倡和集

婦人集

吳門女史徐若水與雲清夫人多倡和之作雲清姓

許氏名玉晨

映玉南樓吟稿

謝安內集與兒女講論文義俄而雪驟降安曰白雪紛紛何所似兄子朗曰撒鹽空中差可擬兄女道韞

曰未若柳絮因風起

世說新語

賈充妻李氏赦還因與充爲定情聯句

詩女史

劉孝綽屏門不出爲詩曰閉戶罷晨弔高卧謝公卿

令嫺續之曰落花掃更合蘂蘭摘復生

直史

魚元機和閨情聯句詩序曰光威哀姊妹三人少孤

不后妍乃有是作精粹難儔予因和焉

唐音統鑑

景龍中栢梁體聯句帝曰大明御寓臨萬方皇后曰

顧慙內政翊陶唐長寧公主曰鸞鳴鳳舞向平陽安
樂公主曰秦樓晉館沐恩光太平公主曰無心爲子
輒求郎上官昭容曰當熊讓輦愧前芳

唐詩紀事

丘舜中諸女皆能文詞每內集必聯詠爲樂

西清詩話

朱素娥名斗兒曲中名伎也與陳魯南聯句有芙蓉
明玉沼楊柳暗銀堤之句爲時所稱

本事詩

郭女善詩嫁時阻風安仁舖時王守仁亦阻風至此
作石牛山詩云安仁舖內倚闌干遙望孤牛俯在山
郭女聞之卽續下句云任是牧童鞭不動田園荒盡
至今閒守仁大喜命備綵幣送過湖完親

女士集

唐三鄉留題以翰墨非婦人女子之事名字隱而不書但書會昌壬戌歲仲春十九日二九子爲父後玉無瑕并無首荆山石徃徃有題按二九十八木字也爲父後子字也木子爲李玉無瑕去其點也并無首存其并也王并弄字也荆山石徃徃有者荆石多韞玉當是姓李名弄玉也係會稽人從夫入函關夫卒扶櫬東歸過三鄉題哀憤詩於壁

雲溪友議

潘夫人王氏泊舟汰王灘下月夜登岸書一絕石壁有汰王灘下相思處猿叫空山月滿船之句今詩已漫滅獨末署太原二字爛然如新

名媛璣囊

宋三班奉職鹿生爲子娶婦婦方懷孕三月鹿生利
月俸逼其上道遂沒於信州杉溪驛將沒乃自書驛
壁具述逼迫悲楚狀恨父母遠無地赴訴言極哀切
頗有詞藻讀者無不傷感

女世說補

靖康間有女子爲金人所掠自稱秦學士女道中題
詩云眼前雖有還鄉路馬上曾無放我情

艇齋雜著
陶朱新

錄亦記秦少遊女題壁詩流落南來事可嗟云云

有題詩黃連步壁云妾鄱陽人也

景定建康志

朱橫妻錢氏隨夫客嶺右夫死攜遺孤扶柩歸鄉題
望湖亭壁云昨暮抵此以風急未能濟艤舟城下夜

分不寐西風颯然而來皓月皎然窺人斯時也況羈

旅乎

女世說

女郎張惠卿題常山店壁云人遞投前店廳廳守破

窓一燈明復暗顧影不成雙

泗波雜誌

英州司寇女幼年侍父任英州歸過大庾嶺蕩然無
梅遂市三十本植於嶺之左右女因留詩於寺壁云
滇江今日掌刑回上得梅山不見梅輟俸買栽三十
樹清香留與雪中開

墨客揮犀

新嘉驛有會稽女子題壁詩并序

彤管新編 蘭陵集口會稽女子名

李秀

節婦宋氏洪武初坐戍金齒奉姑偕行過盤江守渡

題詩郵亭壁上訴其流離困路之情

鐵橋志集日宋氏

女士

人嫁衛州士人士人死獄中母妻戍金齒衛

鮎魚池湯泉有石刻明武宗宮人王氏詩

松亭行紀

宋蕙湘秦淮女也被擄至河南衛題四絕句於壁間

後書秦淮難女宋蕙湘和血題

板橋雜記

郊城驛壁有三絕句末書吳中羈婦趙雪華題

南行筆載

朱氏海昌人過虎邱山題詩壁上有云天連淮海三

千里煙鎖吳城十萬家

吳林

白雀寺竹上有女子刻詩後書吳門蘇氏碧虬題

蘇軾

涿州驛壁有詩後書晉中薄命妾徐淑題

本事詩

清風店有西陵難女宋娟遺筆

綿津山人集

女郎曹希蘊貨詩都下有人以敲桺交爲韻索賦咏

新月詩曹賦云禁鼓初聞第一敲乍看新月出林梢

誰家寶鏡新磨出匣小參差蓋不交

桐江詩話

方維儀宮閨詩史刊落淫哇

靜志居詩話

閨秀閨集皆河東君所勘定

河東君傳

宮伎商玲瓏謝好好與元白酌唱每以筒竹盛詩往

來

唐語林

女子紫竹與方喬相得贈喬生查子詞云晨鶯不佳

啼故喚愁人起無力曉粧慵閒弄荷錢水欲呼女伴
來鬪草花陰裏嬌極不成狂更向屏山倚其風調可
知也 嬋媛記

王荊公妻吳國夫人亦能文嘗有詞約諸親游西湖
云待得明年重把酒攜手那知無雨又無風脫酒可
喜 隱居詩話

琴操嘗改秦少遊滿庭芳詞東坡賞之

能改齋漫錄

湖州吳氏女美慧能詞坐姦繫獄時王龜齡爲守命
作詞女援筆立就龜齡賞而釋之 醒醉編

章文虎妻劉氏名彤字文美工詩詞

茗溪漁隱叢話

李易安居士趙明誠妻晚年賦詞有于今憔悴風鬟
霜鬢之句又清菴鮑氏秀齋方氏淳熙間二婦人詞
筆可繼易安之後

貴耳錄

易安以重陽醉花陰詞函致明誠明誠映實自愧弗
逮務欲勝之一切謝客忘寢食者三日夜得五十闕
雜易安作以示德夫德夫曰莫道不消魂簾捲西風
人似黃花瘦只三句佳乃易安作也

婦媛記

朱希真名秋娘博覽古今適徐必用必用久商不歸
秋娘作詞以自解

宋詞紀事

臨安倡女儀瑄頗慧悟能立成詩詞

興間總錄

陸敦禮侍兒名美奴善綴詞出侑樽俎每丐韻于坐客頃刻成章

茗溪漁隱叢話

鄭文常寓川都其妻孫氏多以詞寄之一時傳播酒樓伎館皆歌焉憶秦娥云花深深一鈎羅襪行花陰行花陰閒將柳帶試結同心目邊消息空沉沉畫眉樓上愁登臨愁登臨海棠開後望到如今

古詩苑記

孫道絢號冲虛居士黃子厚母平生詞甚富晚遭回祿燬蕪無餘所傳數篇皆膾炙人口者

林下詞

范仲允爲相州錄事其妻作伊川令寄之伊字寫尹字允嘲詩云料想伊家不要人妻復答詩解之

查註

易彥章寧宗朝狀元其妻寄詞云功名成就不還鄉

石做心腸鐵做心腸

填詞集彙

廣漢營妓小名僧兒善填詞

漢皋詩話

林延齡妻邵道冲喜爲詞脫略脂粉氣

寶慶四明志

劉燕哥善詞嘗賦太常引饒齊參議

青樓集

王修微天仙子詞眉公稱爲千古絕調

林下詞談

顧姬善詞有一輪月照一雙人面之句

夢蕉詩話

武林女子王倩玉貌美工詞悅其中表沈生而越禮

焉有寄沈長相思

香祖筆記

徐粲字湘蘋海昌陳之遴夫人善屬文兼精書畫詩

餘爲本朝第一拙政園詩餘跋

花並夫人宮詞之外尤工樂府蜀亡入汴書葭萌驛
壁云初離蜀道心將碎離恨綿綿春日如年馬上時
時聞杜鵑書未畢爲軍騎催行

蜀中詩話

徐君寶妻被掠至杭題詞壁上投水死

渚山堂詞話

盧女郎隨父往漢州題驛壁鳳棲梧一闋

女世說

蔣興祖女美顏色年方笄值靖康之亂爲賊所獲過

雄州題減字木蘭花詞於驛壁

詞曠

張玉蓮人呼張四媽善唱曲嘗作折桂令

青樓集

梁園秀姓劉氏製小梁州紅衫兒等曲

曲中志

有才女因姦見郡守守聞其名將械示之指械爲題
命作一詞女賦黃鶯兒云奴命木星臨霎時間上下
分松杉裁就爲緣領交頸怎生畫眉不成低頭盼不
見弓鞋影爲多情風流太守持贈與佳人守大稱賞
卽釋之

湖海新聞

葉薰綢精於曲律所著有鴛鴦夢雜劇

午夢堂集

卷四十四